

LETARE DI UN EMIGRANT AL PLEVAN DI RUALP

Monico, 7 avrîl 1975

Stimât siôr Plevan,

ch'a mi scûsi dal indiriz fat a la buine e dai pôs bêz che j mandi, ma j volares ch'a mi mandas lis « Flabis di Fedro ».

J al disarai ch'j soi cence diu (ateo) e miscredent, però se in Friûl a si fases Messe e predicje par furlan mi svissinares cetant a la glesie: no, ch'a mi crodi, al sares salacôr un « svizinament strumentâl », ma lu fa-sares.

Lu saludi cun afiet e mandi.

Dionisio Claudio
Karlsfelderstrasse, 215/253
8 München 50 (D)

* * *

No si pò jentrâ in nissune cussienze nè sbisiâ tai segrez dal cûr dal omp. Chest emigrant, che jò no cognos, al dîs di no crodi in Diu e al scrîf a un predi.

Mi parares di žurâlu che nol va plui in glesie parceche a si è intivât o in tun predi ch'al capive dome la sô o in tune religjon lamie.

Si puedial clamâ « ateo » un ch'al bute da bande une religjon ch'a no à nissun savôr?